

THESES.



Digitized by the Internet Archive
in 2016

<https://archive.org/details/b22414022>

COMPETITIO AD AGGREGATIONEM

JUSSU REGIS OPTIMI ET EX MANDATO SUMMI REGIÆ UNIVERSITATIS

MAGISTRI INSTITUTA ANNO 1823.

Eademne sporadicis ac popularibus morbis
Curatio?

THESES

Quas, Deo favente, in saluberrimâ Facultate Parisiensi, præsentibus
competitionis judicibus, publicis disputationibus subjectas tueri
conabitur, die mensis januarii, anno 1824.

AMEDÆUS DUPAU,

Medicinæ Doctor, Societati medicæ Londinensi, Hunterianæ, multisque aliis
adjunctus.

Sanabiles inter morbos, nullis magis quam popularibus
inclaurescit medicus: in sporadicorum curatione magni,
in epidemicorum Thaumaturgi nomen sibi comparat.

PARISIIS,

EX TYPOGRAPHIA FEUGUERAY,

Viâ vulgò dictâ cloître Saint-Benoît, n° 4.

M DCCC XXIV.

COMPETITIONIS JUDICES :

PRÆSES. D. ESQUIROL.

JUDICES. DD.	{	LANDRÉ-BEAUVAIS.
		BERTIN.
		CAYOL.
		FIZEAU.
		RECAMIER.
		ROYER-COLLARD.

VICES-GERENTES.. . . . DD.	{	JADIOUX.
		ALIN.

COMPETITORES :

DD.

ANDRAL.	LEGER (Théodore).
BAILLY.	LEGER (Victor).
BAYLE.	LEGRAS.
BOUILLAUD.	MARTIN-SOLON.
CHAMPESME.	MESLIÉ.
CRUVEILHIER.	MIQUEL.
DELONDRE.	PIORRY.
DESTOUET.	RAMON.
DUGÈS.	ROCHOUX.
DUPAU.	TUFFIER.
GÉRARDIN.	VELPEAU.
GIBERT.	

EADEMNE SPORADICIS

AC POPULARIBUS MORBIS CURATIO ?

Εἴ τι θεῖον ἔνεστι ἐν τῇσι νοουσοῖσι.

ΙΠΠΟΚΡΑΤΕΣ Προγностικόν.

I.

Proaemium.

AD privata et communia, ad simplicia et maximè composita pertinere totamque medicinam ferè amplecti hæc quæstio videtur. Sporadicis quidem et popularibus morbis adhibita curatio multis antiquorum scriptis illustrata fuit. Hippocrates primus inter omnes axiomata tam perfectè statuit, ut pauca à successoribus addita fuerint : popularium morborum doctrinam observationibus et præceptis firmavit, illorumque signa mirabiliter prævisa tradidit. Attamen nonnulli apud recentiores, systématur erroribus inservientes, quæ ab antiquis stabilita fuerant diruere voluerunt; epidemicum characterem omninò rejiciendum, et morbos sive sporadicos, sive populares ad unam et similem curationem semper reducendos decreverunt. Inter antiquorum et neotericorum opiniones veritatem stare forsàn inveniæmus. In universum ab aliis jactata, in angustum ab aliis contracta, quasi manca et debilis incedit epidemorum doctrina. Cùm magni momenti sit hujus problematis solutio, derelictis theoriæ commentationibus, nullo alio duce nisi observatione et experienciâ, omnes quæstionis ambages explorabo, ut hinc et illinc vera et utilia, quòcumque occurrent, eliciam. « Etenim, ut ait sagacissimus Klein, liberam profiteor medicinam, nec ab antiquis sum, nec à novis, utrosque ubi veritatem colunt sequor. »

Problematis solùm præcipuas partes attingam, et quò faciliùs expen-

dantur, dicam : 1°. Definitionem sporadicorum et popularium morborum ; 2°. Causas peculiare quibus grassantur ; 3°. Signa pathologica quibus exprimuntur ; 4°. denique Curationem ex istis deductam.

II.

Definitio sporadicorum et popularium Morborum.

Scholastica definitio sufficiet ut omnibus pateat quosnam morbos sub illo respectu auctores designent : sic elucidatis verbis ad rectam solutionem pergere erit promptissimum.

Sporadici (ἀ σπειρω, *dispergo*), dicuntur morbi dispersi, varii, et passim grassantes. Privati opponuntur popularibus morbis, et omni tempore, omnique loco nati, singulos separatim invadunt.

Populares morbi appellantur, qui generalibus causis conflati, multos corripiunt : nonnulli illos Pandemicos nominârunt à verbis græcis πᾶς et ὄχλος, *totus populus*.

1. In Epidemicos dividuntur morbos, qui variis temporibus exoriri solent aeris aut etiam alimentorum vitio.

2. In Endemicos (1), qui frequentes sunt in unâ regione ob causam locis peculiarem. Ab epidemicis differunt, quia isti semper iidem in uno loco omnem vim quasi congerunt ; alii verò repenti nati variant et expanduntur.

3. In Contagiosos, qui activitate quâdam præditi suñ similem excitant morbum, vel proximo contactu, vel actione interpositâ. Hic non est tanti disserere quid intersit contagionem inter et infectionem : nulla de illis dicam. Ad epidemicos et sporadicos morbos potissimum omni ope atque operâ intendam.

(1) Illorum verborum maximè incertum argumentum præbet græca origo. Etenim *epidemicus*, ἐπὶ ὄχλον, super populum, et *endemicus*, ἐν ὄχλῳ, in populum significat : quod non multum differt. Attamen præpositiones ἐπὶ, *super*, et ἐν, *in*, præsertim in aerem, et in loca causas quærendas indicare posset

III.

*Causæ quibus sporadici et populares grassantur
Morbi.*

Naturam morborum præsertim causæ faciunt et proprium curationis modum indicare valent. Sed nos sæpissimè fugit mali origo et in naturæ abditis sese penitus abscondit. Aliundè cùm observationi patet, variis morborum causis effectus proprios adscribere difficillimum est. Quæ quidem ad causas quibus populares morbi gignuntur, rectissimè applicantur.

Haud pro incerto habendum easdem adesse causas in excitandis popularibus et sporadicis affectionibus, et variis modis quibus invadunt, agunt et perstant, solùm differre. Itaque peculiares illas conditiones indagare et effectus diversos persequi operæ pretium erit quò faciliùs deducatur illarum affectionum comparatio.

1. Ex his quæ multis communia sunt popularium morborum causas oriri constat, quoniàm totius urbis, regni incolas simul amplecti possunt. Aeris et tempestatum varietas undiquè nos circumdat, et quòcumque refugiamus, nos sequuntur et obsident; alimentorum et locorum vitiosa actio in universum nos afficit. Sed non solùm in homines sed etiam in animalia aliquotiès extenduntur causæ; indè Epizootiæ quæ causarum universos effectus demonstrant.

Sporadici morbi ex generalibus etiam causis pendent; vis autem illarum, privatis finibus circumscripta, veluti in arctum propriè agitur.

2°. Perstantes longo tempore premunt popularium morborum causæ; sporadicorum vero fugiunt et mutantur. Tempestatum enim varia successio sparsas solum affectiones parit; autumnalis intemperies sequenti anni tempore suscipitur et mitigatur. Quasi per circulum abeunt et redeunt variæ tempestates et effectum effectui comprimunt. At cùm cœli gravitas valet, cùm calor et humiditas, frigus et siccitas longiùs protrahuntur aut invicem ingravescent, tùm populares apparent morbi. Quæ Cœlius Seneca in Aphorismatibus eximie annotavit.

Causæ enim, quæ continuâ vi premunt, multùm a subitâ impressione differunt: illæ penitus agitant corporis partes vitalemque modum afficiunt. Dr. Edwards coràm scientiarum parisiensem Academiam explanavit animalia, ad longum caloris vel frigoris gradum exposita, propriis phænomenis distingui. Hæc eadem in locorum conditionibus patent.

Accidit quoque ut causæ valeant etiam quùm producta fuerit affectio et novis semper effectibus popularem morbum augeant. Illa morbosa conditio non sporadicis inest aut facilè avertitur et illorum causæ protinùs evanescent.

3°. Ad præterita populares morbi referendi sunt ut vera instituantur ætiologia. In sporadicis verò præsentis causæ majoris momenti sunt, et mali quàm plurimùm, in ipso quasi temporis momento producti originem offerunt. Epidemicæ autem affectiones ab anteriore temporis statu profluunt; quam Hippocrates compertam habuit veritatem cùm scripsit: « Non possunt præsentis morbi cognosci nisi ex præteritâ temporum constitutione, nec futura divinari nisi ex præsentium consideratione.»

IV.

4°. Graves et validæ sunt popularium morborum causæ, corporibusque varios motus et quasi novam naturam admovent. Non tam altè in vitalem constitutionem penetrant sporadicorum causæ et illarum effectus quodam vitæ repulso minuuntur. Multò magis valent causæ in producendis epidemicis affectionibus. Sæpè enim morbosa impressio in corpore permanet, et licet procùl insalubri loco etiam exhibetur. Narrat Caius Britannicus multos Anglos febre sudatoriâ correptos fuisse, dùm in Angliâ quam antea liquerant morbus ille sæviebat. Heister in altorfianc epidemio, Degner quoque Noviagami similia observaverunt.

Non solum vi majore graves fiunt epidemorum causæ sed etiam infectione quâdam invalescunt. Non de contagiosâ activitate agendum, sed de putridis miasmatis aut paludum effluviis, quæ ex animalium et vegetabilium dissolutione oriri solent; innumeris probantur exemplis illi effectus qui totam regionem depopulari possunt.

Diversis sexûs, ætatis, temperamenti modis inflectuntur sporadicarum

affectionum causæ , et nullæ aut variæ fiunt. Popularem autem morborum validæ causæ sæpè unicam formam imprimunt et ferè omnes sexus , ætates , temperamenta amplectuntur. Quibusdam tamen exemplis exceptis manifestum est veluti mirâ proprietate quosdam malo epidemico præmuniri posse. Degner in calamitoso Noviagami epidemio gallos et judæos rarò correptos fuisse animadvertit; Barcinonis quoque recens morbus 1821 mulieres frequentius afficiebat.

5°. Multiplices sunt et compositæ popularium morborum causæ , omnesque in producenda mala magis minùsve concurrunt. Sic difficillimum est fontem mali detegere quia non ex unicâ causâ devenit popularis morbus, sed multis, repetitis, oppositis, implicatisque causis coalescit. Compertum est quantum effectus differant ob compositam illam actionem quæ nova novis , gravia gravioribus, contraria contrariis semper auget et mutat.

Sporadicæ vero affectiones ad certam originem reduci possunt et ut plurimum , dummodò rectè et accuratè observentur , præcipuis et paucis causis adscribuntur.

Hæc est summa inter sporadicorum et popularium morborum causas comparatio. Minimè tamen in animo fuit certis finibus et quasi æneo muro illas apertè secernere; quippè eas sporadicorum et popularium morborum causas multis conjungi partibus et solum actionis quibusdam modis distingui , admittendum mihi apparuit.

V.

Nunc si ad omnes perpensas causas reflectamus , lucidior nobis fiet *Epidemicarum Constitutionum* doctrina. Multis erroribus quasi obscurata, tamen à medicis observationi addictis culta manet et vera medicinæ practicæ fundamenta statuit. Constitutio medica incertè definita , tunc quasi cœli tempestas varia, tunc ut corporis pathologica conditio nuncupatur. Sic causa et effectus miscentur et altera pro altero accipitur.

Semper ex aeris varietatibus et vitiis constitutiones pendere, et certos effectus anni tempestatibus gigni prisci auctores admisérunt. Hippocrates

morbos vernaes , æstivales , autumnales , hyemalesque distinxit et illorum naturam multiplicesque formas observavit. Ipse dicat Hippocrates :

« Quod autem ad anni tempestates attinet , si hyems sicca et aquilonia fuerit , ver autem assidue pluviosum et austrinum , febres acutas et ophthalmias et dysenterias æstate fieri necesse est , maxime mulieribus et viris natura humidis. (*Aphor. 2 , sect. III.*)

» Si verò æstas sicca et aquilonia , autumnus verò pluvius et austrinus fuerit , capitis dolores hyeme oriuntur et tusses et raucitates et gravedines , nonnullis etiam tabes. » (*Aphor. 13 , sect. III.*)

Secundum ista et multa alia cuique anni tempore morbosa conditio adscripta fuit. In vere inflammationes , in æstate biliosas affectiones , melancholicas in autumno , catarrhales in hyeme innasci et augeri plerique medici statuerunt. Indè quum annis tempestas quædam longo tempore valet nec ab aliis deletur , constitutio fit seu inflammatoria , seu biliosa , etc. Sed non aeris varietatibus tantum conflatur constitutio medica : sæpissime accidit ut nullus inter morborum et temporis mutationes existet consensus et cum magnis tempestatibus sanitas tamen floreat. Celeberrimi medici Sydenham , Van-Swieten , Ramazzini meteorologiæ signa incerta esse observaverunt , et per ea omnes causas morborum explicari negarunt. Itaque nonnulli aliquid ignotum , το θελον ut ait Hippocrates , in aere fusum admiserunt vanamque hypothesim quasi naturæ arcanorum explicationem fecerunt.

VI.

Medicas constitutiones ad omnes causas quas supra perpendimus reverti potissimum nobis videtur ; etenim non solum gravitas cœli has tantas mutationes efficit , sed alimentorum vitiosa natura corporibus quasi continuum venenum infundit ; sed locorum insalubritas undique sanitatem inficit ; sed etiam pathemata animum perturbant et vires frangunt : in universis enim causis popularium morborum quærenda est origo. Quippè si observationes epidemiarum perlustramus , hæc confirmata nobis apparebunt. In epidemico morbo Mutinensi a Ramazzini descripto videbitur temporum subversas qualita-

tes , regionem aquis coopertam , vitiatam alimentationem et multa alia concurrere. In Neapolitano epidemio Sarconnius , in mucoso morbo Gottingæ Roederer et Wagler , omnesque observatores sagacissimi causas multiplices et implicitas notaverunt.

Medicæ constitutiones multum sæpè protrahuntur et morbos diuturno similique modo signant : ut causa continua et gravis est , ita effectus durare solent. Multi auctores morborum stabiles constitutiones nobis tradiderunt. Hippocrates , in Epidemorum libro tertio , eandem constitutionem tres annos permansisse descripsit. Sydenhamius variabilem constitutionum mutationem subsecutus est : primam , per quatuor annos 1661—1664 ; secundam , per duos annos 1664—1666 ; tertiam , per duos annos ; et sequentis dimidium , etc. Deniquè , ultimam quam observavit non certis circumscribere finibus potuit. Sagacissimi Stoll Ephemeridibus apparet quoque biliosam epidemiam ab anno 1776 usquè ad 1778 pervalsisse ; inflammatoriâ autem constitutione sequentem annum signatum fuisse. Per totum annum trahuntur morbi populares ab illustrissimis Sarconnio , Tissot , Zimmermann descripti.

His observationibus instructus , Raimond massiliensis novam theoriam admittendam existimavit ; et quia morborum varium characterem , epidemio impressum , cognoscere sæpè arduum est , duos solum constitutionis medicæ modos admittere voluit , fortem et mollem (*mode fort* , *et mode mou*). Observatione suâ animadvertit alium alio excipi , et per decem et octo annos massiliæ permansisse. Cujus medici systema non firmaverunt quæ ab aliis postea fuerunt observata. Attamen nonnulli recentiores morbos reipsâ sub inflammatorio aspectu nunc sæpius apparere et mutatam constitutionem credunt. Forsân theoricæ discussiones in mentes leviter irrepserunt clâm iis , et quasi invitis. Illa maximè ardua quæstio historię medicæ multa arcana elucidaret , sed longè ab omni demonstratione remanet.

VII.

Ex illis sequitur constitutiones medicas non in morbum perennem et quasi larvatum consistere ; sed morbosa videtur dispositio, quamdam *pathologicam diathesim* ut dicam, à multiplicibus et contextis causis contractam. Quùm illustrissimus Sydenham *febrem stationariam* admisit, hypothese supervacuâ observationem veram obscuravit. Etenim hæc est mera, ut fastidiosè iterat in lectionibus et scriptis Paracelsus novus, Ontologia quæ sine signis et symptomatibus morbum procreat. Non illâ tamen falsâ opinione innitendum, ut tota constitutionum doctrina rejiciatur : non corrui veritas multis licet oppressa erroribus. In Historiâ medicinæ solertissimus Sprengel, vana et pertenuia contra illam argumenta objicit. Vituperanda rejicias, observatione autem confirmata serves, et novis etiam augeas. Cur enim causæ multiplices, continuæ et graves corpora in profundum agitare et severos diuturnosque effectus producere non possent ? Analogia et observatio unâ et rectè respondent.

Constitutio medica non semper eadem est : tùm levis, suum modum sporadicis affectionibus solùm imprimit ; tùm vehementior popularibus morbis ortum dat, diciturque *Epidemica*. Præsertim constitutionum impressione variantur morborum sporadicorum et popularium signa, illorumque curatio.

VIII.

*Pathologica signa quibus distinguuntur sporadici
et populares Morbi.*

Ut rectè instituatur morborum curatio , diligenter examinanda sunt signa quæ illorum naturam ostendunt. Iidem morbi sub duplici aspectu vel sporadico vel populari exhibentur. Sic omnes febres quæ sparsim grassantur epidemicæ fieri possunt. Finke , Zimmermann , Stoll febrem biliosam epidemicam ; Sarconnius , Rœderer et Wagler febris mucosæ epidemos descripserunt. Rariùs inflammatoria febris in popularem morbum vertitur ; attamen à doctoribus Hoyer , Heister et Navieres collecta extant exempla. Variæ inflammationes , et neuroses quoque in universum extendi possunt et verè epidemicos morbos conflare. Constat enim melancholias quasdam , et convulsiones innasci urbesque contagio quasi morali inficere ; ut patet ab exemplis Milesiensem , Lugdunensiumque puellarum et diversâ convulsionum propagatione.

Morbi chronici populares ad endemios pertinent quia epidemico more numquam expanduntur ; sic strumæ , herpes , etc. Alii sunt qui numquam sporadici , semper epidemicè erumpunt ; scilicet febris sudatoria et typhus icterodes. Attamen non planè admissa fuit illa opinio : nonnulli febrem sudatoriam paulùm ab inflammatoriâ differre et icterodem cum intensâ febre biliosa aut potiùs cum gastro - enteritide confundere voluerunt ; sed hi designati morbi epidemicum modum induunt et minimè nec febri sudatoriæ , nec icterodi accedunt. At nunc , frustrà symptomata mutantur ; frustra medicamina variantur ; ne herclè , ait novi systematis auctor , unicus est morbus , unicum est remedium.

IX.

Quùm iidem morbi sporadico et populari respectu comparantur, quædam pathologica emicant signa quæ penitus cognita habere multum ad curationem confert.

1. Nova symptomata gravissima in morbi epidemici ortu sæpè apparent et diagnosim obscurant. Angina, peripneumonia, dysenteria in populari statu non genuinum cursum lustrant, sed eruptionibus, miliaribus, petechiis, vomitibus insignes fiunt, ut sagacissimi viri Zimmermann, Pringle, Tissot et alii in epidemias observârunt. Pathologica facies in mucoso morbo Neapolitano (Sarconne) multis gravibus et præcipiis symptomatibus differt a febre mucosâ Gottingensi (Ræderer et Wagler), multum quoque a febre mucosâ sporadicâ. Singuli epidemici morbi comparati varium in modum præbent signa propria et ad curationem maximè utilia. Etenim haud verum est illa symptomata ad varietates ætatis, sexûs, temperamenti referenda: in universis illi communes morbi characteres ostenduntur et ex epidemicâ naturâ pendent. Quæ in aliis observata fuerunt aliorum diagnosi utilia sunt et morbum veluti novis phænomenis oblectum expandunt.

2. Gravior fit generatim epidemica quam sporadica affectio. Dysenteria quæ sparsim homines invadit benigniter et ferè ab omni periculo offertur. Aliquoties epidemicæ dysentericæ, sicuti pestis, nosocomia urbesque devastant et nullo remedio suspendi possunt. Anginæ epidemicæ brevi tempore per gangrenam evadunt et mortem afferunt: Fotherghill, Huxham, Lepecq-de-la-Cloture, hujus epidemii innumerales observationes attulère.

Ille gravior status in popularibus morbis præsertim funerum numero patet. Affectio simplex quæ sporadica nunquam mortem efficit, nunc epidemica tantam hominibus affert stragem ut nulla sit inter illas statuenda comparatio.

X.

Sæpè accidit ut populares morbi sporadicos et intercurrentes retineant et quasi à progressu arceant. Quod quidem observatoribus etiam qui non medicinam excolebant compertum est. Thucydides, in pestis athenarum mirâ descriptione, signavit ferè nullos per eam morbosam tempestatem aliis morbis sporadicis afflictos fuisse. Schnurrer narrat in Oriente epidemiæ finem è sporadicorum morborum ortu nuntiari. Indè apparet vitalem organisationem penitùs epidemico morbo absumptam non aliam morbi suscipere posse excitationem, ut ait Hippocrates: Duobus *laboribus* (1) simul obortis non in eodem loco, vehementior obscurat alterum. Rarior autem et incerta est sporadicorum morborum actio ad propulsandum epidemum qui multò magis viget.

Sæpissimè miscentur sporadici intercurrentes morbi cum popularibus variumque in modum symptomata et characteres epidemii concipiunt. In febre mucosâ Gottingæ, Røederer et Wagler observatum habuerunt morbi popularis actionem et formam vehementer in sporadicis exprimi. Sic puerperæ affectionibus propriis quasi aphthis; mamillarum doloribus, alvi profluviiis, sæpè in pedibus et manibus œdemate afficiebantur. Sagacissimus Stoll animadvertit febris biliosæ signa in phthise apparuisse; Genovensisque Tissot similes multasque affert observationes.

(1) Δύο πόνων ἅμα γινομένων... *Aph.* 46, s. II. Vox græca πόνος, non *dolor*, ut dicunt commentatores, sed *labor* significat. Itaque non solùm doloribus applicatur hoc axioma, sed etiam omnibus vitæ functionibus, digestioni, partui, cogitationi, morbo, etc.

XI.

Curatio in sporadicis et popularibus Morbis comparata.

Sic etiologiæ et pathologiæ positis signis , therapeuticas indicationes sedulo perpendamus.

In universum eadem convenit therapia morbo sive sporadico sive populari. Epidemorum historias pervolvendo invenitur febrem biliosam epidemicam Lausanæ feliciter emeto-catharticis tractari sicuti in sporadico statu ; inflammatorias affectiones in utroque casu iisdem remediis sanari. Quæ ut aliis exemplis nitar supervacuum planè videtur. Aliundè certis observationibus et non paucis patet morbis popularibus ac sporadicis aliam curationem aliquoties esse adhibendam. Tunc nocent enim prius solita in sporadico morbo remedia ; et alia autem propria epidemicam affectionem levant et discutiunt. Maximè arduum est morbi obiectam naturam perspicere et à juvantibus et lædentibus necessariè fit indicatio. Ex illis observationibus Sydenham opinionem tradidit empiricam : sustinuit veram epidemiæ nascentis curationem omninò sibi esse ignotam et solùm ab experienciâ repeti posse. Non ideò tam desperata videtur morborum popularium naturæ investigatio ; et licet in quibusdam inordinatis epidemis obtegatur et abdita sit , tamen causarum historia et pathologica signa universè collata ad detegendum epidemicum characterem prodesse possunt. Eadem in hac solutione mihi apparet difficultas ac in noscendis ægri cujusdam temperamento et idiosyncrasiâ quibus morbi forma et medicamentorum effectus mirum in modum commutantur.

Constituendum tamen in morbo epidemico nascente sæpiùs latere quænam propria convenient remedia ; solitisque primùm admotis , ad juvantia et lædencia confugiendum. Quùm apparet angina epidemica venæsectione et hyrudinibus applicatis plerumque debellatur. Sin autem per gangrænâ evaserit , quod observatione tantùm patet , aut minimè aut

rariùs sanguis mittitur. Hoc ità esse multa ab auctoribus collecta probant. In gangrænosâ anginâ populari à Fotherghill 1650, 1715, 1746 observatâ; a Richter 1755, et a Bergins 1757, venæ-sectio multa mala et mortem celeriter afferebat. In aliis inflammatoriis morbis similia observata sunt. J. Wierr et Sennert peripneumoniam epidemicam tradiderunt quam sanguis emissio graviolem lethalemque efficiebat. Similes observationes scripit Ballonius; Worster quoque in epidemo pneumonia-rum Philippoburgi nec sanguine largè emisso, nec emeticis levati affec-tionem, sed meliùs sudorificorum et præcipuè camphoræ usum ad-mittendum esse animadvertit. Lancisi autem in epidemicâ pleuritide balsamica et vesicantia solùm utilia esse perspexit, dum priore anno, venæsectio in simili morbo prosperè successerat.

Dysenteriæ curatio in sporadico et populari statu similia et propria scilicet præbet exempla. Sic in epidemicâ dysenteriâ D.^r Latour opti-mum esse opium declarat : ab illustrissimo Ramazzini observatus epide-mus feliciter opii maximam copiam administrari et multùm nocere san-guinis missionem pariter edocet.

XII.

Ex istis constat observationibus medicamenta varia adhiberi, licet in eodem morbo epidemico, nec cognosci posse quonam modo efficiantur tantæ affectionum varietates. D.^r Ozanam, in epidemorum historiâ, op-positam illam morborum curationem non rectè comprehendit et com-paratis epidemorum exemplis utiliora remedia esse quæ sæpius et fe-liciùs adhibita fuerint, judicat. At illius solutionis vitium omnibus pa-tet; in præsentì enim tractandâ epidemiâ mille observationes variam et peculiarem curationis naturam præscribere non possunt et quanvis emetica in ferè universis casibus optima esse notum fuerit, in isto ta-men periculosa sunt et venæ-sectione utiliùs supplentur.

Quapropter singulos populares morbos accuratè observare oportet; et quæ propria sunt continuâ et sedulâ observatione investigare. In omnibus casibus curationem generalem et quasi à priori deductam præ-scribere ridiculum et maximè noxium est. Quid dicam de edictis à ma-

gistratibus et medicis quoque promulgatis ad curationem mali præscribendam? Recentissima facta adsunt. Celeberrima facultas de populari morbo consulta opinionem splendidissimam edixit, at quùm salutifera pervenit consultatio, non jam morbo eadem natura nec forma eadem et jam nova admovenda erant remedia. In recenti Gaditanâ epidemiâ, hispanus archiater quasi medicam legem hujus civitatis incolis imponere et procùl a morbo, in singulos dies certa præscribere non dubitavit. Talis est enim Sinensis medicus qui in libro quodam signata remedia semper adhibere gravibus pœnis cogitur. Sed popularis morbus ut sporadicus variare potest et in ortu alia, alia in statu et in remissione adhibenda sunt medicamina. Præbet enim in variis gradibus tanquàm unius morbi ætates: nascitur, crescit, minuitur et evanescit; illudque per tempus natura morbi perstare aut mutari potest.

XIII.

Nunc de sporadicorum intercurrentium morborum curatione popularibus comparatâ præcipuè agendum. Summa hæc est quæstio et in medicina practicâ maximam habet utilitatem. Durante biliosâ epidemiâ, sæpè pleuritides, anginæ, rhumatismi aliique morbi excitari possunt et cum morbo populari ita misceri ut iisdem remediis pugnandi sint. Sydenham, Ballonius, Stoll, Frank has morborum complexiones annotavêre, et similis curationis ob successum epidemi quasi symptomata illas apparere rati fuerunt.

Attamen non in his implicatis morbis eadem curatio generatim institui potest, quia in singulis varia est complexio et therapeuticis applicationibus sæpe opposita. Sæviente biliosâ Gottingæ epidemicâ febre, Ræderer et Wagler cum illâ tertianam implicatam esse observaverunt. Corticis pervianæ usus sæpissimè periodicos insultus inhibuit; sed in aliis observationibus kinæ ope ingravescebat uterque morbus, et solum febris epidemicæ curatio tertianam domare poterat; emeticis et aliis remediis ille complexionis gradus tractandus erat, quia eminebat mucosa affectio. Multis aliis observationibus hæc confirmare mihi promptissimum esset. Non solum acutas affectiones, peripneumoniam, dy-

senteriam epidemo ferè omnes involvi dicerem , sed etiam chronicos morbos et chirurgiæ operationes illius actione propriâ ingravescere. Illa quidam paucis exemplis illustrare suscipiam.

Finke in Teceliensi morbo narrat paralysim , hæmorrhoides , hæmoptysim , epidemicam naturam induere , et in his remedia affectioni biliosæ propria admittenda. Røederer et Wagler annotavère cum hydrope , scorbuto et etiam cum malo venereo implicatam esse epidemiam illarumque curationem difficillimam efficere. Quùm autem mucosa affectio vulneribus affictos invadebat , tùm febris acutâ et gravis irrumpebat , suppuratio vulnerum celeriter vitiabatur ; illorum curatio maximè dubia et implicata erat.

At verò in multis aliis observationibus nulla epidemo adhibenda est cura. Sæpè enim sporadicus morbus cum propriis signis et naturâ simplici apparet , solitoque artis auxilio sanatur. Multùm infelix est medicus qui epidemicum characterem quòcumque insequendi causâ , in illum semper remedia aut inutilia aut damnosa inimitit , omnesque morbos sub illo generali respectu semper judicat. Etenim singulæ observationes perpendendæ sunt ut complexionis morbi varias et therapeuticas indicationes amplecti queat. Hic præsertim valet medica Analysis quæ non subtilis est doctrina , ut aiunt , sed quæ universa et varia medicinæ practicæ præcepta comprehendit et illa quodam philosophiæ vinculo conjungit.

XIV.

In popularibus morbis propulsandis utiliter agit Prophylactica , in sporadicis autem victûs ratio. Rectis legibus et melioribus institutis certè minuitur morborum epidemicorum frequentia et jàm sub illo respectu ab antiquis multò nostra differunt tempora. Etenim rarius apparent lethiferi illi morbi qui quondam tam multos passim invadebant et è medio tollebant. Quùm adhuc gentibus incubaret barbaries ; quot annis ferè istius modi pestis irrumpebat cujus perditû horrenda manebant vestigia. Cujus victoriæ honorem sibi medicina vindicare potest , quæ tam sævis hostibus urbes , provincias ; regnaque integra depopulantibus non unum at innumeros cives eripuerit.

Non tam prosperè egit medicina cum sporacis morbis. Penes eam quidem est cuique nostrum planè detegere omnia quæ sanitatis damnum afferre valent ; at non sui juris varios omninò casus periculosasve animi cupidines avertere : ex quibus veluti de fonte in humanum genus tam multa tamque acerba mala decurrunt. Itaque sporadicarum affectionum increscere numerus , extensis pathematum impressionibus , videtur ut jam prius in alio scripto exposui (1). Inter illas omnes causas quæ multis augentur aut multis aliis emendantur , crescit tamen in dies hominum numerus.

XV.

Conclusio.

Ergo eadem est sporadicis ac popularibus curatio , variis tamen sub modis quos signare tentavi.

(1) *De l'Eréthysme nerveux , ou Analyse des Affections nerveuses* , in-8°.

FINIS.